

Dedica na Chinto Croes

Tur cos ta cla pa Festival di Mariachi awenochi na Aruba

ORANJESTAD (AAN): Tur cos ta cla pa un evento hopi spera pa amante di musica ranchera.

Awe Diasabra anochi lo tin e Tercer Festival di Musica Mexicano, e esaki ta organiza pa ARTISTAR (Artistanan cu Amor pa Musica y Arte) y UNOCA unda 4 categoria lo tembla China Clap riba diasabra 31 Augustus pa 7or di anochi.

Fundacion Artistar bao auspicio di Unoca tin e gran honor di dedica e Festival aki na tres baluarte cu durante hopi aña a contribui pa engrandecé nos Cultura Musical den diferente genero.

CHINTO CROES:

Cu su 15 aña Sr. Jacinto C. Croes conoci como Chinto Croes, e trompetista, a start cu les di musica cerca Frere Fredericus. Cu e edad hoben ey te cu su 18 aña e tabata integrante den e banda 'Estrella Musical'.

Despues den 'Impacto Musical' como trompetista p' 3 aña. Chinto tambe a lanta su



mesun Banda 'Combo A' (Combo Aruba) y a sa di mantene pa 6 aña tocando Bach Trombone, e tabata director musical, arreglista, cargado di instrument y organizador di Fiestaan bailable.

Despues el a integra den 'La Inspiracion' y 'Los Juveniles', bandan hopi popular di Aruba. Chinto a participa

tambe como cantante den Tumba Festival y a compone pa Henry Kock, Mario Steenen y hobennan cu a bay cu Corona di Reyman Infantil manera, E Pato, E Trein, 'Kokoyoco ta mi te' gu' canta pa Rupi Rupi Croes y Derrick Dubero tambe a conkista e corona!

Cómo arreglista Chinto a yuda pa e Road March King Tito Flores (di feliz memoria) cu e cancion ganador King Kong!

Asina Chinto Croes a sigui arregla y compone pa varios artista local cu temanan tipico, cancionnan Mexicano y otro genero. Tambe pa Dia di Sta Cruz, Himno di Ekipo di Estrella, arreglista principal den e produccion di Chaly Croes 'Mi guitarra y serenata' cu e 'Duo Oro' Berta y Aileen! el a aporta na hopi Festival di Dande. el a compone hopi tema pa Festivalnan di Himno y Bandera, den tur Chinto su composicionnan y arreglo a sa di cay den premion! Boso ta corda e famoso tema "Sopi Yawana"? Chinto a graba na



Venezuela cu Casa Disquera Fideles cu Los Juveniles, den temporada di fin di aña, tur tempo di Folklor y tambe cancion pa Betico Croes (dfm). Mariachinan cu el a participa tabata; Mil Amores, Mariachi Guadalupe, Copa de Plata, Aruba y Mariachi Estrella. Alkanen el a participa den workshop na Mexico y a toca tambe cu Mariachi Perla di Aruba den e encuentro cu miho Mariachinan di Mundo! Chinto a participa tambe den Show di Ama Gabriel na Aruba. Naturalmente Curaçao, Bonaire y Hulanda no a perde

Chinto su presentacion como trompetista.

Chinto su hobby tabata futbol cu e tabata hunga pa Union Sa Cruz, Vitese y Centro Deportivo Ayo. el a funda S.V. Sporting y tabata miembro di A.V.B. Chinto Croes a combina Deporte y Musica cu a resulta fantastico pa su trayectoria musical.

Jacinto C. Croes 58 aña a duna su tempo valioso pa mantene nos Cultura y Amor pa Musica y deporte! Awenochi lo ricibi su merecido honor durante e Festival di Musica Mexicano.

Biografia di Imelda Rustveld

Norma Imelda Rustveld mihó conoci como Imelda, naci na Aruba. Casa cu Julio Quandus y tin 5 yiu. Imelda no ta un persona desconoci den e mundo artistico y specialmente den e mundo di Mariachi.

Imelda a cuminsa canta desde su mucha, rond di añanan 1965. A canta cu diferente grupo di Aguinaldo den e tempo ey.

Gruponan di Aguinaldo manera "Los Coloramicos" . Los Preferidos di defunto Concho Ras.

Tambe na e mesun momento a canta cu Mariachi Perla di Aruba y tabatin e honor di canta como Guest Star cu Tito Cortes di Colombia cantante / compositor di bolero y otro ritmoan di cancion.

Asina añanan a pasa y a participa na Festivalnan di Ranchera. Hunto cu: Bertha Wolff, Vale Croes cu ta su primo y Linda Wolff, Jolanda v/d Linden, Bubu Bissip, Sigfried Pradl pa menciona algun di e grandinan den e mundo di Ranchera.

Un cancion cu a hibe na ser hopi conoci tabata e cancion cu yama: "LA BASURITA" cu e cancion aki el a participa tambe na Curaçao y a sali un di e ganadonan den añanan 1979 pa 1980. Di cual e promer LP di Mariachi Perla (Shon Pa) tabata e motor tras di tur esaki. Tambe a biaha pa canta na Bonaire y St. Maarten.

Imelda Rustveld a canta tambe cu mariachi Los Montañeros y Mariachi Orguyo di Aruba dia cu e tabata nan cantante estelar pa varios aña. El a canta na diferente Hotelnan/ Fiesta di fama manera Bruid/ Hacimiento di aña y hopi mas. Y den su aporte tambe como miembro di hurado pa varios festivalnan di Ranchera.

den añanan 90 el a ricibi un reconocimiento cerca Señora Silvia Tromp y Sulaisa Paesch pa su añanan den e musica di Ranchera y aporte na e genero di Ranchera.

Y na aña 2011, Imelda a lanta su mes un grupo di Aguinaldo hopi conoci... Aguinaldo Flor di Pasco. Den cual Imelda ta solista/ con e ta Manager di e grupo. E grupo a logra saca su CDnan y e cancion: "Caballito Blanco" den voz di Imelda a ser mas conoci, gusta y pidi den December.

Su grupo ta activo y a logra diferente premio. Imelda na e momentonan aki no por ta presente cu nos, debi na kebrante di salud, pero su yunan lo ricibi e reconocimiento den su nomber.



Biografia di Shon Pa Kelly

Pablo Kelly a nace dia 23 di juli 1933. E ta e di 2 yiu homber di Victoriano y Maria Salome Kelly. Pablo a lanta na Tanki Leendert den un famia di 8 ruman. Desde un edad hopi jong Pablo a cuminsa toca trompet y a forma parti di tanto bandanan musical como gruponan di Mariachi.

Den e mundo di Mariachi Pablo ta hopi conoci, como cu el a organiza diferente festivalnan ranchera na Aruba y tambe a organiza festivalnan di ranchera ABC. Pablo a forma parti di Mariachi Aruba, Mariachi Perla di Aruba, Mariachi Orguyo y Mariachi Lirios del Campo. Tambe Pablo a sa di representa Aruba internacionalmente den festival di Mariachinan na Ciudad di Mexico.

Mariachi Perla di Aruba tambe tin e siguiente historia di e bunita trayectoria musical di sr. Pablo Kelly, cariñosamente yama 'Shon Pa'. Na aña 1962, Pablo Kelly a ingresa den Mariachi 'Perla di Aruba'. E aña ey 'Pablo huntu cu Perla'

A graba e prome disco 45 cerca Kalkboom, cancionnan: "Un mal amor y pobre vaquero", composicionan di Supriano v/d Ende, canta pa Bertrando Henriquez. E tempo ey 'Pablo huntu cu Perla' a compaña Tito Guizar y Lilia Guizar den Show di 'Padre del Caribe y su Show'. Esey tabata na 1964. E aña ey sr. Pablo Kelly a retira di Mariachi Perla di Aruba. Na aña 1979 sr. Pablo Kelly a regresa 'Mariachi Perla di Aruba' pa bay toca na e Festival di Antillas na Curaçao. E Festival ey a ser organiza pa Josy Brocke Jr. Na 1980 bao direccion di sr. Pablo Kelly e prome longplay a word graba. Esey tabata cu e mesun cantantenan cu a representa Aruba den e festival di Antillas. E mesun aña el a organiza e prome festival di cancion Mexicano riba tereno di feria na Santa Cruz na unda tur e mariachinan di Aruba a participa. Tambe el a organiza e prome Festival Infantil di cancionnan mexicano na Bonaire Club y tambe Antillas. E mesun aña el a organiza tambe un tour pa Mexico. El a organiza e segundo festival di cancionnan mexicano pa Aruba y Antillas. Na aña 1981 Mariachi Perla di Aruba a graba su di dos LP bao direccion di sr. Pablo Kelly (Shon Pa). Kelly. Na aña 1981 sr. Pablo Kelly a organiza e segundo festival infantil.

Pablo Kelly huntu cu 'Mariachi Perla di Aruba' a organiza den Club IOWUA un Show di 25 Aniversario di Mariachi Perla di Aruba cu musica di mariachi y baile. Sr. Pablo Kelly a laga traha un 'Cancionero' na e ocasion di e 25 aniversario di Mariachi Perla di Aruba. Na 1982, Pablo Kelly a organiza e prome Festival di Cancion mexicano na Papiamentu na Club Caiqueto. Na 1982 tambe a organiza e di tres Festival Aruba y Antillas. Y bao direccion di sr. Pablo Kelly e di tres LP a word graba. Na aña 1983 sr. Pablo Kelly a tuma su retiro di Mariachi Perla di Aruba. E aña 1982 sr. Pablo Kelly a regresa cu Mariachi Perla di Aruba. Mariachi Perla di Aruba tabata toca den tur hotelnan na Aruba y algun lugaran priva. Bao direccion di sr. Kelly, Mariachi Perla di Aruba a biaha pa e prome 'Encuentro Internacional' den los mariachis Guadalupe.

Na aña 1995, Pablo Kelly a tuma su retiro y despedida di 'Mariachi Perla di Aruba'. Mariachi Perla di Aruba bao direccion di Miguel v/d Linde kier a gradici Pablo Kelly na e ocasion aki, pa tur e añanan cu el a labora cu Mariachi Perla di Aruba, pa su aporte, tempo y dedicacion.

